



Palanisamy (tiga dari kiri) menukar perjanjian bersama dengan Zulkifli (bersongkok) pada majlis menandatangani MoU antara MyCuepacsCare dengan GAKUM di USIM, hari ini. - NSTP/Hasriyasyah Sabudin

## GAKUM jalin kerjasama dengan MyCuepacsCare, tingkatkan penyertaan penjawat awam dalam takaful



Oleh Tuty Haryanti Ahmad Rodzi  
tuty@bh.com.my

Share

**NILAI:** Kurang kesedaran mengenai kepentingan memiliki perlindungan takaful di kalangan penjawat awam, menyebabkan hanya kira-kira 300,000 atau 20 peratus daripada 1.7 juta penjawat awam di negara ini yang memiliki perlindungan itu.

Melihatkan peratusan yang masih rendah itu, MyCuepacsCare dan Gabungan Majlis Presiden dan Setiausaha Kehormat Kesatuan Kakitangan Universiti Awam Malaysia (GAKUM) menandatangani satu memorandum persefahaman (MoU).

Presiden GAKUM, Zulkifli Mohamad, berkata MoU itu bertujuan melaksanakan program pendidikan dan kesedaran kepada kakitangan awam mengenai kepentingan memiliki perlindungan takaful.

Katanya, ketika ini terdapat seramai 300,000 ahli GAKUM dan lebih 500,000 kakitangan awam di 20 universiti awam seluruh negara.

“Dengan adanya MoU ini kita menyasarkan untuk memastikan semua ahli GAKUM dan kakitangan awam di universiti awam mempunyai takaful,” katanya kepada pemberita selepas majlis menandatangani MoU antara MyCuepacsCare dengan GAKUM di Universiti Sains Islam Malaysia (USIM) di sini, hari ini.

MoU itu ditandatangani oleh Zulkifli mewakili GAKUM manakala MyCuepacsCare diwakili Pengarah Urusannya, K Palanisamy.

MyCuepacsCare dilantik Kongres Kesatuan Pekerja-Pekerja Dalam Perkhidmatan Awam (CUEPACS) sebagai pengendali program takaful khas untuk kakitangan awam dalam mempromosikan takaful menerusi taklimat di 20 universiti awam, manakala GAKUM akan membantu mendapatkan kelulusan taklimat daripada pihak universiti.

Mengulas lanjut, Zulkifli berkata, dengan adanya MoU itu nanti, usaha MyCuepacsCare untuk memberi penerangan kepada kakitangan awam di universiti awam menjadi lebih mudah sekali gus membuka mata mereka untuk mempunyai perlindungan itu.

“Saya juga akan membawa cadangan supaya majikan dapat membantu kakitangan mereka dari segi kebijakan dengan membantu membayarkan pelan takaful yang diambil kakitangan mereka,” katanya.

Sementara itu, Palanisamy berkata, MyCuepacsCare menawarkan perlindungan takaful khas kepada kakitangan awam iaitu Takaful Penghospitalan dan Pembedahan CuepacsCare dan Program Takaful Kemalangan Diri CuepacsPA dengan bayaran serendah RM85 bagi satu keluarga dengan perlindungan sehingga RM60,000 setahun.

Katanya, perlindungan takaful yang ditawarkan itu, diwujudkan sejak tahun 1999 dan setiap tiga sehingga lima tahun akan diselaraskan mengikut keperluan semasa.

“Kita sentiasa berusaha menawarkan perlindungan serendah yang mungkin bagi memastikan kakitangan awam mampu membayar caruman setiap bulan.

“Malah kita menyasarkan untuk memastikan sekurang-kurangnya 50 peratus kakitangan awam di negara ini mempunyai perlindungan takaful menjelang penghujung tahun 2020,” katanya.

Katanya, kajian oleh MyCuepacsCare mendapati kesedaran kakitangan awam untuk memiliki takaful meningkat setiap tahun tetapi oleh kerana caruman bulanan yang terlalu tinggi ramai yang tidak berkemampuan.

Oleh itu katanya, dengan adanya MoU itu pihaknya yang mempunyai seramai 600 ejen diharap mampu memberikan penerangan yang jelas mengenai kepentingan untuk memiliki perlindungan takaful.